

JOSUÉ

Israelitabo, Josuénin jato ikinna jaskarabo winota yoia

Moiséssen toan Diossen Josué kenaa

1 ¹Ibon yonoti Moisés moa mawata pekáora, jan akinbea Nunman bake Josué Ibon yoia iki:

²“Nokon yonoti Moiséssa moa mawáke, jaskara ixonra rama min jatíbi Israel jonibo jato Jordán paro shitakinti iki, jaskataxa en mato mai meniainko mato kati iki.

³Ja Moisés en yoini keskáakinra, jatíbi ja maton taen jamatai mai en mato meniti iki.

⁴Ja mato en meniti mai riki, tsoa jonibi jain jaama mananhinoax peooko-tax Líbano mananyabi, jainoax aniparo Éufrates kaman, itan jatíbi hititabaon maiyabi, jainoax aniparo Mediterráneo kaman.

⁵Tsonbira mia jaai kaman, reteanankin miaarestima iki, ea Moisés betan ikátiai keskáribira ea mibé iti iki, enra mia potatima iki, jawetianbira en mia jenetima iki.

⁶Rakéma itan koshi shinanya iwé, minra nato jonibo mai menipaketi iki, jara maton rekenbo en jato meninoxon yoini iki.

⁷En mia yoiái riki, rakéma itan koshi shinanya mia iti, jainxonra jatíbi ja nokon yonoti Moiséssen mia esé meniabo, min senenhati iki. Ja esekan yoiái keskáshaman min senenhaitianra, jatíbi ja min akai jawékibo jakonbires kati iki.

⁸Ja Diossen esé kirika meran yoiáibo, banebanekin nete itan yamé yoyo axon shinankin jan yoiái keská akí jatíbitian jawé, jatianra jatíbi min akaibo jakon pikóti iki.

⁹Ea riki jan mia raanai, rakéma itan koshi shinanya iwé. Rakéyamawe itan min shinan yosmayamawe, ea riki min Ibo Dios jaweranoki mia kaai, jainribira ea mibé iti iki”, akin.

Josué reteanani kanox benxokata

¹⁰Jatianra ja jema koshibo Josuénin neskáakin jato yoia iki:

¹¹“Jatíbi carpa peotabo ikain kaxon jato yoitankanwe, ja boti jaton jawékiati jawékibo moa benxoakanon ixon, nenoax kimisha netera non Jordán paro shitai kaai, ja non Ibo Diossen noa meniai mai binoxon”, akin.

¹²Jainxonribira, Josuénin Rubenman rarebobo betan Gadnin rarebobo, jainoax jatíribi naponbekon senenres Manaséssen rarebobo jato neskáakin yoia iki:

¹³—Shinankanwe, Ibon yonoti Moiséssen mato jaskáti yoini, matora maton Ibo Diossen yoia iki, ja mai biax jain jaax moa mato tantinon ixon.

¹⁴Ja maton ainbobo, maton bakebo itan maton yoinabo nenobi jenekanwe, ja nato mai mato Moiséssen Jordán keiba meniniori. Ikaxbi jatíbi ja reteananti atipana jonibora, jayakax reteananti jawékibo biax, jaton kaibobo reteanantian akini jato bebon bokanti iki,

¹⁵jain tantiti Ibon jato mai meniai kaman, mato aká keskaribiakin, jatianra jaboribi Ibon mai menia, moa ibo banékanti iki. Japekáora maton mainko ja paro bari pikotaiori ikáo mato banéti iki, ja Diossen yonoti Moiséssen jatíbitian matona inon ixon mato mai meniniori —akin.

¹⁶ Jatianra jabaon yoia iki: —Non abánon jatíbi ja min yoia keskáakin, jaweranoki min noa raanai, jainra noa kati iki.

¹⁷ Ja moatian non Moisés ninkáxon-katiai keskáribiakinra, mia non jatíbitian ninkáxonti iki. Jaskara iketian mia non yokatai riki, ja Moisés betan ikátiai keskáribi ja min Ibo Dios mibé ikára jakonhira iti iki ixon.

¹⁸ Jatíbi ja min ati yoiabi miki yoiti-maibo, itan ja mia ninkáxonkashamai-bora non jato reteti iki. Jaskara ixon mia non yoiái riki, mia rakéma itan koshi shinanya itires —akin.

Paranaxon Jericó jema ointi Josuénin jato raana

2 ¹ Sitimhainxonra Josuénin rabé joni paranaxon Jericó jema ointi raan-kin jato yoia iki: “Botankanwe jawekeska mairin, itan jawekeska jemarin ixon Jericó jema oinni”, akin. Jabo boaxa Jericóainoa westíora tsini ainbaon xobónko nokókana iki, jawen jane iká iki Rahab, jainra ja yamé oxakana iki.

² Ikaxbi wetsaxon Jericó apo keshan-kin neskáa iki: —Jaweti israelita jonira joke, nato yamé paranaxon nato mai oinni —akin.

³ Jatianra apon Rahab neskáakin yoiti jato raana iki: —Ja mia oinni bea ja min xobonko iká jonibora min jato pikoti iki, jabo ronki nato mai oinni beabo iki —akin.

⁴ Ikaxbi jato jonea ixonra, yoia iki: —Ikon riki jaweti jonira eiba bekana iki, ixonbira jaweranoaboki ikanai ixon en jato onanyamaa iki.

⁵ Moara yametaishokobi bokanke, ja hora jema xepoti moa xepokanai iketian, enra onanyamake jaweranora bobirakanke. Ikaxbi ramabi chibani boxonra, maton jato nokoti iki —akin.

⁶ Ikonra iká iki, ja ainbaonra jawen xobo pekatén jato mapémaxon, lino nishi choshinon ixon tsamá meran jato jonémaa iká iki.

⁷ Apon jonibaonra Jordán paro nashitatinco kaman jato chibankana iki. Ja sontárobo pikóbaina pekábira xepóti xepokana iki.

⁸ Jatian ja paranaxon oinni beabo oxaamatianbira, jato ikain mapéxon Rahabnin jato yoia iki:

⁹ —Enra onanke nato maira Ibon mato menia iki, jakopíra noa ikonbiresi raketai. Jatíbi neno jabora ikonbiresi rakékanai.

¹⁰ Nonra onanke mato Egiptonkoniax pikónontianra, Diossen mato shitánon ixon joshin aniparo mato jene tsosin-maxona iki. Jainxonribira non onanke, Jordán paro keiba iká rabé amorreo-baon apo Sehón itan Og, yamatiakin maton retea iki.

¹¹ Jaskarabo onanax ikonbiresi rakékinra, mato betan reteanantibobi tsonbi shinanama iki. Ja Ibo, ja maton Dios iki bochiki naikanmea, itan nato naman iká mainmea Diossibi.

¹² Jaskara kopíra, en mato yokatai akonkin senenhanoxon nenonxonbi maton ea yoiti, ja Ibo kopi nokon rarebobo maton jakonhati, en mato jakonha keskáribiakin. Jatian ikoni mato ikai en onannon ixon ea westíora jawéki axonkanwe,

¹³ jainxon, nokon papa betan tita, nokon poibo, itan nokon wetsabo jaweayamakin maton jamati iki, jainoax jatíbi jato betan ikáboribi. ¡Mawáti ikenbi noa kishpinmakanwe! —akin.

¹⁴ Jatianra jabaon yoia iki: —Mato janon ikax noa ibanon mato kopi mawati, ikaxbira nato jawéki mia keshatima iki. Jawetianki nato mai Ibon noa meniai, jatianra akonkin, mia non jakonhai onanti senena iti iki —akin.

¹⁵ Rahab iká iki, ja jema chike maxkaténbi westíora xoboakanaton jaa, jainxonra westíora risbí ventananin paninxon jato pakémaa iki.

¹⁶ Jaskáxonra jato yoia iki: —Ja mato benaibaon nokonaketian mananman botankanwe. Jainra mato kimisha

netepari jonéti iki, jan mato benaibo nato jeman banékanai kaman. Japekáora mato karibati iki —akin.

¹⁷Jatian jabaon yoia iki: —Nonra mia akonkin senenhaxonti iki, ja min noa jaskáti yokata keskáakin.

¹⁸Ikaxbi jawetianki nato main noa jikiai, jatianra jan noa pakémaa ventaninan, min joshin risbi paninti iki. Jainxon min xobonko jato tsinkiwe, min papa, min tita, min poibo jainoax jatíbi min papan kaibobo.

¹⁹Jaweratoboki ja min xobonkonixax pikotai, jabora jatonbinix mawáti iki; ja jaskataibora non imaama iti iki. Ikaxbi tsonki, ja min xobon ikábo meetai, nonra jabo ointi iki.

²⁰Ikaxbi nato jawéki min jato keshan-ketianra, nonribi ja mibé akonkin senenhanoxon mia non yoia jawéki non senenhatima iki —akin.

²¹—Non jaskara akára jakon iki —akinra ainbaon aká iki. Jainxon jato raanara, moa jaabo bokana iki. Japekáora, ainbaon ventananin moa joshin risbi nexaa iki.

²²Jatian ja paranaxon oinnai rabéra mananman kaax, kimisha nete senen jain jonékana iki, ikaxbi sontárobaonra jatíbiain benakinbi jato nokoyamaa iki, jainoaxa moa Jericóain banéribikana iki.

²³Jatianra ja paranaxon oinnaibo, mananmameax ipaxexon paro shita-kana iki, jainoax banébaini boax Josuéiba nokóxon, jatíbi ja winota jawé-kibo yoikana iki.

²⁴Neskáakinra yoikana iki: “Jatíbi ja maira moa noa Ibon menia iki. Jaskara ikaxa, jatíbi ja main jaa jonibo, moa raketen mawataibo iki”, akin.

Israelitabaon Jordán paro shita

3¹Ja nete xabata kikin yamékirisho-kora, Josué jatíbi israelitabo betan Sitimhainoax boax Jordán paronko nokókana iki; ikaxbi shitáyamaira jain-hipari banékana iki.

²Jainoax kimisha nete winota pekáora, joni koshibo carpa peotabo tsamatainko bokana iki,

³jainxonra israelitabo neskákanon ixon jato yoikana iki: “Jawetianki ja Ibon ja senenhabeonti joi jain iká ani bonantia, ja levita sacerdotebo winotai maton oinnai, jatianra ja mato ikainoaxbo pikóxon, maton jato chibanti iki.

⁴Jatianra maton onanti iki jaweratonki mato kati iki ixon, jawetian-bira mato westíorabi moatian ja bain kayosma iki. Ikaxbira, ja ani bonanti ochóma mato katima iki, jatíbitianra mato japekáó banéti iki, ja ikainko nokóti westíora kilómetro maxkatakinko”, akin.

⁵Jainxonra Josuénin jato yoia iki: “Maton yora mekebainhanan chokitax itan maton shinanyanixbi benxokakanwe, Ibon bakish mato bebonxon jaskara iosma jawéki akaira maton ointi jake”, akin.

⁶Jainxonra sacerdotebo yoia iki: “Ja senenhabeonti joi jain iká ani bonanti bixon, ja jonibo bebon paro shita-kanwe”, akin. Jatianra sacerdotebo ja senenhabeonti joi jain iká ani bonanti bix, jonibo bebon shitákana iki.

⁷Jatianra Ibon Josué yoia iki: “Rama peokootax mia kikin iikaresaitianra israelitabaon mia oinkanti iki. Jaskáaxonra jabaonbi ointi iki, ea Moisés betan ikátiai keskáribi, ea mibé iketian.

⁸Minra sacerdotebo yoiti iki, ja senenhabeonti joi jain iká ani bonanti boaibo, Jordán paro kexa nokotax, jain neníkanon ixon”, akin.

⁹Jatianra Josuénin israelitabo yoia iki: “Neri bexonpari ninkati bekanwe, ja maton Ibo Diosen yoiai.

¹⁰Ja jiria Diossa noo napon iki ixon, maton onanti kopíronki, mato kaaitian cananeobo, hititabo, heveobo, ferezeobo, gergeseobo, amorreobo, jainoax jebuseobo jato keyokin potaboti iki.

¹¹Oinkanwe, ja jatíbi nato mainmeabaon Ibon ja senenhabe konti joi jain iká ani bonanti, mato bebonbi Jordán paro shitamakanaitian.

¹²Jaskara ixon, rama katókanwe chonka rabé joni, ja chonka rabé tsamá Israelnin rareboboibakea westíorabo.

¹³Jatian ja nato mai Ibon esé jain iká ani bonanti boai sacerdotebaon, jaton tae jenenko moa nenanketianra, paro jene chopéti iki, ani chiké keskara wetsaoribicho tsamáti iki, rebokiaxa moa jene baitima iki”, akinbo.

¹⁴Israelitabora jain jaton carpa peota ikainoax, paro shitai boi jokonkana iki, jatianra ja senenhabe konti joi jain iká ani bonanti boai sacerdotebo jato bebon kaa iki.

¹⁵Jatian ja yoabo tsekattitianra, Jordán jenetiata iká iki. Jaskara ikenbi jato sacerdotebaon paro kexa nokóxon jaton tae jenenko aká mechaketianbira,

¹⁶rebokiax jene baiti jeneta iki, jaskara winotara ja Saretán patax iká Adam jemainoax ja ochóbires iká iki. Jainoaxa aniparo mawatakiri boai jene, jaki boi keyotai kaman baita iki. Jaskatax paro jene chopékettianra, israelitabo Jericó jema bebon shitákana iki.

¹⁷Jatíbi jonibora Jordán paro tsosina manxanshamantonin shitákana iki, jaskakanai kamanra, Ibon ja senenhabe konti aká joi jain iká ani bonanti boai sacerdotebo, mai manxaman taxkéyamai charókana iki, ja Jordán paro naponbekon.

Chonka rabé makan Jordán paromea bikana

4¹Moa jatíxonbi Jordán paro shitákana pekáora, Ibon Josué yoia iki:

²“Katówe chonka rabé joni nato jemamea, já rarebobires tsamatainkonia westíorabo,

³jainxon jato yoiwe, ja sacerdotebo jain chankata paro naponbekonmea, chonka rabé makan bikanon ixon, ja boxonra nato yamé mato jain tantiainko akanti iki”, akin.

⁴Jatianra Josuénin ja chonka rabé katota jonibo kenaa iki,

⁵jainxonra jato yoia iki: “Jordán paro naponbekon botankanwe, non Ibo Diossen esé jain iká ani bonanti bebon, jainoara westíoraxonbo, westíora makanbo iaxon maton beti iki, ja westíora tsamá Israelnin rarebotiiti bi iti kopíra iti jake chonka rabé makan,

⁶jara itiki westíora jaweki maton ja oinxon onanti, iikaxon maton bakebaon mato yokáti iki: ‘¿Jawe yoi ikárin nato makánbo?’ akin.

⁷Jatianra maton jato yoiti iki: ‘Ja Ibon ja senenhabe konti joi jain iká ani bonantiaxon Jordán paro shitakanontianra, jato bebonmeaxbi paro jene chopetax oken ibékona iki. Jaskara ikenra israelitabaon nato makánbo oinxon jatíbitian shinankanti jake, nenoax jaskara winóni jawékibo’ ”, akin.

⁸Jatianra Josuénin yoia keskáakin jabaon aká iki. Ja Jordánhainoara chonka rabé makan bikana iki, ja jatí tsamá Israelnin rarebotiiti bi, jainxonra boxon ja carpa peotainko tsamankana iki, ja Ibon Josué yoia keskáakin.

⁹Jaskáribiaxonbira, Josuénin wetsa chonka rabé makan tsamana iki, ja senenhabe konti joi jain iká ani bonanti boai sacerdotebo jain ikanainko. Ja makánbora ramakamanbi jainbi iki.

¹⁰Ja senenhabe konti joi jain iká ani bonanti boai sacerdotebora, Jordán paro naponbekonshaman ikana iki, ja Josuénin jaskara ati, Ibon yoia israelitabaon jatíbi jawéki akanai kaman. Jatíbi ja akanabira, Moiséssen Josué ati yoia keská akana iki. Jainoaxa jonibo moa ishtonbires shitákana iki,

¹¹jaskati moa jatikaxbi keiba shitákana pekáora, ja Ibon ani bonanti boai sacerdoteboribi shitatax, jakiribi moa jato bebon bokana iki.

¹²Jainoaxibira ja reteananti onanbo, ja Rubenman rarebobo betan Gadnin rarebobo, itan jatíribi Manasésen

rarebobaonribi paro shitakana iki. Jabora shitákana iki moa reteanantires, ja Moisésen jaskáti yoia keskátira wetsa tsamá israelitabo boai bebon bokana iki.

¹³ Irabiraa iki chosko chonka waranka joni, ja jayakax reteanantiabo, ja moa reteanantires ikax Ibo bebon boira, Jericó mai teshanpaori bokana iki.

¹⁴ Ja netebaonra Ibon jatíbi Israel jonibo ratémaa iki, jainxonra Josué kikin shinannax jaki rakékantiribi jato imaa iki, ja Moisés janontian akátikanai keskáribi itiakini.

¹⁵ Jatianra Ibon Josué yoia iki:

¹⁶ “Ja senenhabeonti joi jain iká ani bonanti boai sacerdotebo, moa Jordán paromeax bekanon ixon jato yoiwe”, akin.

¹⁷ Jatianra Josuéni moa bekanon ixon jato yoia iki,

¹⁸ jatian ja Jordán paromeax mapetax, moa main ja sacerdotebo niketianribira, ja paro jene moa ipachoi keskáribi jenetiax moa baita iki.

¹⁹ Israelitabora Jordánhainoax, reken oxe chonka neteya iketian pikókana iki, jainoaxa Jericóainxon oinna bari piko-taori iká Gilgal jemanko banékana iki.

²⁰ Jainra Josuéni ja chonka rabé makan Jordánhinoa bekanabo tipina iki,

²¹ jainxonra israelitabo yoia iki: “Iikaxonra maton bakebaon mato yokáti iki. ‘¿Jawe yoi ikarin nato makanbo?’ akin.

²² Jatianra maton yoiti iki, jawekeskatxi israelitabo Jordán chopeketian, mai manxanshamantonin shitáni ixon,

²³ itan jawekeskaxonki Ibo Diosen mato shitánontian Jordán jene tsosin-maa iki, ja moatian joshin aniparon noa shitánontian aní keskáribiakin, ixon.

²⁴ Jatianra jatíbi nato netemea joni-baon, ikon riki Ibo koshi ixon onankanti iki, jainxonra jatíbitian maton Ibo Dios kikin hakin shinaxon rabikanti iki”, akin.

Gilgalhainoa carpa peota

5 ¹ Jatíbi ja Jordán paro bari kaiori iká amorreo apobo, itan ja aniparo Mediterráneo ochóma iká cananeo apobaonra ninkákana iki, Israelbo shitánon ixon Ibon jato Jordán paro tsosinmaxona, jaskara ninkatax ikon-biresi rakékinra, israelitabo bekanaitian jato bechitetibobi shinanyamakana iki.

² Jatianra Ibon Josué yoia iki: “Jaweti chichika makan awe, jaskáaxon moa akátiai keskáribiakin, israelitabo jaton jakina rebichi xatexonwe”, akin.

³ Jatianra Josuéni chichika axon Aralot mananmanxon israelita benbobo, jaton jakina rebichi xatexona iki.

⁴ Ja jaton jakina rebichira jato xatexona iki, ja Egiptonkoniax pikókanontian moa sontaro iti baritiayabo infó, ja tsoa jonibi jain jaama mananmameax moa mawákanabo iketian.

⁵ Jatian jatíbi ja Egiptonkoniax pikotax beaibo, moa jaton jakina rebichi xatáyabo ikainbira, ja tsoa jonibi jain jaama mananmameax pikotabo akanama iká iki.

⁶ Ja israelitabo chosko chonka baritia tsoa jonibi jain jaama mananman ikan-nontianra, ja Egiptonkoniax pikotax beaibo jatíbi ja sontáro kati baritiayabo moa mawákanabo iká iki. Ja jonibaonra Diosen yoia ninkáxonyamakana iki, jakopíra janbi jato yoia iki, ja maton rekenbo mai meninoxon en yoinira maton ointima iki, ja maira ikonbires jakonhira ikax kikinbiresi yoábo xoxoi iki, akin.

⁷ Jaskara iketianra, Josuéni ja joni-baon bakebo jaton toan iti jaton jakina rebichibo jato xatexona iki, Ibon imaabo iketian, jatian jabora moa bekanai kopí, moabi jaton jakina rebichi xatexonyamakana iki.

⁸ Jatian moa jatikaxbi jaton jakina rebichi xatáyabobires ikaxa, jato benxoai kamanpari carpa peota meran tantii banékana iki.

⁹Jatianra Ibon Josué neskáakin yoia iki: “Nato maton jakina rebichi xateatonra, Egiptonko yanka yonokatai ikax rabínti iitainbi moa mato bichinke”, akin. Jakopira rama kamanbi jain, jane-kanaí Gilgal, akin.

¹⁰Ja Gilgalhainxonra Israelbaon, oxe chonka chosko neteya iketian, Jericó mai teshanpainxon yantanpake Pascua fiesta akana iki.

¹¹Ja neteribira levaduraoma pan betan trigo tobán pikana iki, ikaxbi ja nete xabáketianra, ja main xoxoa jawékiatibo moa pikin peokana iki.

¹²Jainoax peokotaxa moa maná manni jeneta iki, jaskáketianra israelitabaon ja baritian canaán main xoxoai jawékiati jawékibo jawékiakana iki.

Josué betan ja Ibon sontárobaon koshi iká

¹³Wetsa nete Jericó ochóma iikinra, Josuénin ja bebomea westíora joni espada tsomaya oinna iki. Jatianra Josuénin ochómakainxon neskáakin yokata iki: —¿Miaki nona iki iamax miaki, non rawíbaona iki? —akin.

¹⁴Jaskáara jonin yoia iki. —Eara tsonamabi iki ea neno joára Ibon sontárobaon koshires iki —akin. Jatianra Josuénin maikibi bekepinon kaman beoxon neskáakin yokata iki: —¿Nokon Ibó, nato min yonotininki mia jawe axonti iki? —akin.

¹⁵Jatianra Ibon sontárobaon koshin yoia iki: —Min sandalia jopéwe, ja mia niainra iresama iki —akin. Jatianra Josuénin ninkáxona iki.

Jericó jema jaskáxon reteanankin peoti shinankana

6¹Tsoabira Jericó jemameax jikiti itan pikótibi atipanyamakana iki, jema xepótibora israelitabaon jato anaketian ayamakanon ixon, xepokanabo iká iki.

²Ikaxbira Ibon Josué yoia iki: “Enra Jericó jema, jawen apoyabi itan jawen

sontároboyabi mia menike min anon ixon.

³Mato israelita sontárobaonra sokota nete senen, nato jema netetiibi westíoraakin mayati iki.

⁴Ja kanchis sacerdotebora, ja senenhabekonti joi jain iká ani bonanti bebon kati iki, westíora carnero machán tii atiabo, jainoax ja kanchis netenra, sacerdotebaon machán xoon akai kaman, kanchis akinribi maton jema mayati iki.

⁵Ikaxbi jawetianki wetsaresibiakin, jakonshaman machán xoon akanai maton ninkatai, jatianra jatíbi maton koshianixbi mato safí iti iki, jatianra jan jema chitea chiké ras iti iki. Jatianra mato westíorabo jema ramiai jaakiribainti iki”, akin.

⁶Nunman bake Josuéninra sacerdotebo kenaxon jato yoia iki: “Ibon jato betan jaskara ati shinanna joi jain iká ani bonanti moa bokanwe, jainoax kanchis jatíribi matobora, ja noibamisti shinan esé iká ani bonanti bebon carnero machán tii atiabo bokanti iki”, akin.

⁷Jainxonra ja jonibo yoia iki: “Moa jema mayai bokanwe. Ja reteananti onan jonibora, Ibon ani bonanti bebon bokanti iki”, akin.

⁸Jatíxonbira ja Josuénin yoia keská akana iki. Ja kanchis sacerdotebaonra, ja Ibon ja senenhabekonti aká joi jain iká ani bonanti bebon kakin, kanchis machánribi xoon abainkana iki, jatianra ja ani bonantiaxon chibanbokana iki.

⁹Ja reteananti onan jonibora sacerdotebo bebon bokana iki, jatian jan ani bonanti koiranabora, japekáo bokana iki, ja sacerdotebaon machán xoon akin jeneyamakanai kaman.

¹⁰Ikaxbi ja sontarobora, netéshamanax bokanti Josuénin jato yoia iká iki, jatíbi jaton koshianixbi safí iti jato jan yoiiai kaman.

Jericó bikana

¹¹Josuéninra westíoraakin ja Ibon ani bonantiaxon, jato jema mayamaa iki.

Japekáora, jaton carpa peotainko bané-ribikana iki, jainra yamé tantikana iki.

¹²Ja nete xabata kikin yamékirishoko moa Josué weníketianra, sacerdote-baon, Ibon ani bonanti moa iakana iki.

¹³Ja kanchis sacerdotebora, Ibon ani bonanti bebon bokana iki, ja boira tsasiamakana iki, itan machán xoon akin jeneyamakana iki. Ja reteananai onan jonibora jato bebon bokana iki, jainoax jatíribibora ja ani bonanti pekáo bokana iki. Ja machánbora xoon iki jeneyamaa iki.

¹⁴Ja rabé iti netenra, jakiribi ja jema mayai bokana iki, jainoaxa jaton carpa peotainko banéribikana iki. Ja sokota nete kamanra jaskákana iki.

¹⁵Ja kanchis nete iti xabataitian wenítaxa, moabi abea keskáakin jema mayai boribakana iki. Ikaxbi ja netera, kanchisi mayákana iki.

¹⁶Jatian kanchis akin, sacerdotebaon moa machán xoon aketianra, Josuénin jonibo neskáa iki: “¡Saii ikanwe! Nato jemara mato Ibon menia iki.

¹⁷Nato jemara moa Ibon jaskáti yoia ikax, jatíbi jawen jayata jawékia keyóti iki. Ikaxbi tsini ainbo Rahabbichoresa, jaweayamakin non jamati iki, onsá ikaitian jawen xobon beax jain ikáboyabi, ja paranaxon ointi jato non raanabo jawen xobonko noa jonexonyantana iketian.

¹⁸Jaskara iketianra mato koiramekanti iki, ja jemamea jawéki maton binaketian itan maton tii anaketian, jara moa Ibon keyónon ixon imaa iki, ikaxbi mato Israelbo yoitimaketianra, maton carpa peotayabi jakonmaatax, mato rabinti iikaresti iki.

¹⁹Ikaxbi ja oro, plata itan jatíbi bronce akana jawékibo itan ja yami jawéki-bora, Ibona iti iki, jabora jawen kopí jawéki ikainkobiribi ati iki”, akinbo.

²⁰Jatianra jonibo saf ikaitian machánboribi xoon ika iki. Ja machánbo xoon ikai ninkataxa, israelitabo kikinbiresi koshin saf iki peokokana iki, jatianra ja jema chike ras ika iki. Jaskataitianra

jemakiribainxon, ja jonibaon moa iboakin bikana iki.

²¹Japekáora, espadanin jato retékana iki, benbobo, ainbobo, bakeranonbo, yosibo jainxon jaton wakabo, carne-robo, burrobo. Jatíbi jabora kikinbakin keyokana iki.

²²Jatianra Josuénin, ja paranaxon mai oinni kayantana rabé neskáa iki: “Katanwe ja tsini ainbaon xobonko, kaxon jain jabé ikáboyabi jato pikotankanwe, ja maton jaskaatibo yoiantana keskáakin”, akin.

²³Jatianra jabo boax jikixon, Rahabyabi jawen papa, jawen tita, jainoax jawen poibo, itan jatíbi jawen rarebobo jato pikokana iki, jaskáaxonra ja Israelbaon carpa peotainko jato imayamakin, jatonbiribi tsonbi jaweatimainko jato imaa iki.

²⁴Jaskáa pekáoshokobira israelitabaon jatíbi ja jain ikáboyabi ja jema menokana iki. Neskaraboresa bikana iki, oro, plata jainoax bronce itan yami akana jawékibo, jabora ja Ibon jakon jawéki kopí ikainkobiribi akana iki.

²⁵Ikaxbira Josuénin, ja Rahab betan jawen rarebobores jato jaweayamakin jamaa iki. Jan ja Josuénin Jericó jema ointi raanabo, jato joneyantana iketian. Jainoax Rahabnin kaibobo, israelitabo betan jaai peokokana iki.

²⁶Japekáora Josué Ibo janetaanan neskata iki: “Tsonki jakiribi Jericó jema benáati shinanai, jara Ibo bebon jakonma iti iki. Jaton reken baken yorakibira, jaki chiké koshitibo tsamankanti iki, jainoax jaton chiní baken yorakibira xepótibo nichínkanti iki”, iki.

²⁷Ibonra Josué akinna iki, jaskatira Josué jatíbiain ja main jakon ninka-kaata iki.

Amorreobo jatoareskana

10¹Adonisedec Jerusalénhainoa apora, Josuénin jatoarestaan Hai jema iboaxon jainoa jonibo jato keyoa ninkatax, ikonbiresi raketa iki,



Jerico chiké reokana.

jara jaskáa iki ja moatian jaton apoyabi Jericó jema aní keskaribiakin, ikaxbi gabaonitabora moa israelitabo betan jakonhakin joi benxoataan, moa jato betan jakana iká iki,

²jaskáketian ninkatata ikonbiresi jatoki rakékana iki, ja Gabaón jema kikin itan koshi shinanya jonibo ikax, Hai jema winoa ani itan ikon onanbo ikanaitian.

³Jaskara iketianra, Adonisedecnin, apoboki neskara joi raana iki, Hebrónhainoa apo Hohanki, Jarmuthainoa apo Piramki, Laquissainoa apo Jaffaki, jainoax Eglónhainoa apo Debirki:

⁴“Neno bexonpari ea akini bekanon, Gabaón betan ea reteanaitian, jabaonra Josué itan israelitabo betan jaskara ati joi moa senenhakana iki”, iki iká.

⁵Jaskara ikaxa ja pichika amorreo apobo, jabo iki ja Jerusalénhainoa apobo, ja iki Hebrónhainoa, Jarmuthainoa, Laquissainoa jainoax Eglónhainoa, jabora jainbicho tsinkitax jawen sontároboya, moa reteanax Gabaón bebon bokana iki.

⁶Jatian ja Gabaónhain jabaonra, jatonribi neskara joi Josuéki raankana iki, jatian já iká iki Gilgalhain jaton carpa peotabo ikainko: “Mia akinnaibo noa iketian, matora en akinyamai iki iamawe. Ishton joxon noa akinhanan jato kopíkinawe, jatíbi ja mananman iká amorreo apobora, nobé reteanax moa tsinkíkana iki” iki iká.

⁷Jatianra Josué jatíbi jawen kikin koshi shinanya sontároboya, Gilgalhainoax pikota iki,

⁸jainxonra Ibon yoia iki: “Jawekes-katataxi rakéyamakanwe, jabaonra mato jaweati atipanyamake, en matoki meni-kaamara maton jabo jatoaresti iki”, akin.

⁹Josuékanra Gilgalhainoax pikotax yamé kakashini kaxon, amorreobo betan reteanankin jato ratereskin peoa iki.

¹⁰Ibonbira ikonbireskin israelitabo bebon jabo ratémaa iki, jaskákanke-tianra Josuénin Gabaónhainxon icha-bires jato retea iki. Japekáora, Bethorón bainmea jato chibana iki, Azecá betan Maceda jemanko kamanra amorreobo jato reteboa iki.

¹¹Ja israelitabaon jabámaa, amorreobo Bethorón mai naxankenin bokanaitianra, Ibon anibires oi xewa jatoki bema iki, janra Israelbaon jato retea winobainbires amorreobo jato keyoa iki.

¹²Moa Ibon amorreobo israelitaboki menikaamakettianra, Josuénin jato bebonxon Ibo yoyo akin neskáa iki: “Gabaónhain bari tsasimawe; Ajalón teshanpain oxe tsasimawe akin”, akin.

¹³Jatian, jonibaon jaton rawíbo kopitai kamanra bari betan oxe tsasia iki. Atikeskabiakin ikon yoiai kirikaninra jaskara yoiai. Westfóra netetani-shamanra, bari jikiamaa iki, itan nai naponbekonshamanra bari tsasia iki.

¹⁴Moatian itan ja winota pekáobira wetsa netebi jaskáyosma iki, jaskara inontianra westfóra jonin joi Ibo ninká-xona iki, jaskatataxi Ibo Israelbaon paranan iki reteanana iki.

¹⁵Japekáora Josué itan israelitabo, jaton carpa peotainko Gilgalhain moa baneti bokana iki.

Ja akinbicho jato Josuénin yoia

24 ¹Josuéninra Ibo bebonbi jatíbi Israel jonibaon rarebobo jato Siquemhain tsinkia iki. Jainra iká iki yosibo, joni koshibo, joi benxoai koshibo, itan sontárobaon koshibo bekanon ixon jato kenamaa iki,

²jainxonra jatíbi jonibo jato yoia iki: —Neskárai Ibo ja Israelbaon Dios: ‘Moatianbira maton rekenbaon Tarékan, jawen bakeboyaxon, Abraham betan Nacoryaxon Éufrates paro kexa janontian; wetsa diosbires rabia iki.

³Éufrates kexakeara Abraham en bia iki, jaskáaxonra jatíbiain Canaán main

en nimaa iki. Jainxonra ja kaimanoxon, rekenpari jawen bake Isaac en menia iki,

⁴Jaskáxon Isaac en rabé bake meniara, Jacob betan Esaú iká iki. Ja Esaúra Seírhainoa manan mai en menia iki, ikaxbi Jacob jawen bakeboya Egiptonko kaa iki.

⁵Jatianra Moisés betan Aarón en raana kaxon egipcio bo jato anibires masá tenemaa iki, mato jainoa en pikoai kaman.

⁶Jatian ja maton rekenbo moa Egiptonkonix pikóketianra, egipcio-baon jaton reteananti carretaninxonbo itan kabayoninxonbo, joshin aniparo kaman jato chibankana iki.

⁷Jainxon jabaon ea kenaketianra, jabo itan egipcio bo naxaran ikonbires yamé en jato chitemaxona iki, jaskáxonra egipcio bo aniparo jene en jato mapomaa iki. Jaskara ixonra matonbi onanke en Egiptonko jaskara aníbo. Japekáora basibires mato tosa jonibi jain jaama mananman iká iki,

⁸amorreobaon mainko en mato beai kaman, Jordánhainoax bari pikotaiori. Jabora mato betan reteanana iki, ikaxbi en matoki menikaamakettianra jabo matonhasesa iki, jaskáxonra ja mai maton iboa iki.

⁹Japekáora Balac Sipornin bake, moabitabaon apo mato betan reteanani joá iki. Balacninra, matoki jakonmakin yoyo imakaskin Beornin bake Balaam, benati jato raana iki.

¹⁰Ikaxbi Balaamra, en matoki jakonmai yoyo imayamakin, mato yoi jakonires yoyo inon ixon imaa iki. Jaskáxonra en mato ramiamayamaa iki.

¹¹Jatianra mato Jordán paro shita-baini boax, Jericóain mato nokókana iki. Jericóainoa jonibora mato betan reteanana iki, jaskáribira amorreobo, ferezeobo, cananeobo, hititabo, gerge-seobo, heveobo, jainoax jebuseobo mato betan reteanana iki, ikaxbi en amaara maton jatoaresa iki.

¹²Ja rabé amorreo apora, espadaninbi nin kanótinibni maton jatoaresyamaa iki, enra mato bebon ikonbires nokon raké shinan jatoki raana iki, jaskatira jabo mato nokotamatianbi jabákana iki.

¹³Enra mato jain teetama ikenbi maibo menia iki; jainxon jema akamabo ikenbi en mato jemabo menia iki. Jatian ramara mato jain jaxon, uvabo itan aceitunabo banamaa ixonbi maton jawékiakai' —akinbo. Jainxon Josuénin tekikin yoia iki:

¹⁴—Jaskara ixonra jatíbi natobo kopí, Iboki rakékin, akonkin shinaxon itan akonkinribi maton senenhaxonti iki. Moa maton rekenbaon Éufrates paro kexaxon itan Egiptonkoxon rabikatikanai diosbo jenetaanan, ja Ibon yoiaries axonkanwe.

¹⁵Ikaxbi ja Ibon tee axonkashamakin, rama shinankanwe tson yoiakayaki maton ninkáxonti iki ixon: Ja maton rekenbaon Éufrates paro kexaxon rabikatikanai diosbo iamaxon nato main jaa amorreobaon diosboki, maton ninkáxontiki ixon. Enra, nokon bakebo betan ja Ibon yoia keská ninkáxon, jawen tee axonaires iki —akin.

¹⁶Jatianra jonibaon yoia iki: —Ja non Ibokon jeneyamakinra, jawettianbi ja wetsa diosbo moa non tee axonyamai!

¹⁷Ja non Ibonra noa itan non rekenbo-yabi Egiptonkonja ja kikinshakin yanka yonokaatiainoa noa pikoai iki. Janra ichabires ratéti jawéki noo bebon aká iki, jainxonra non jokin icha jemabo winobeaitian, koiraananbi noa jan akinna iki.

¹⁸Janra noa joai bain iká jatíbi jemabo, noa potaxona iki, ja neno jakattiai amorreoboribi. Jatíbi jaskarabo kopíra nonribi ja Ibon yoiabo ninkáxon axonti iki, itan jara non Dios iki —iki ikana iki.

¹⁹Ikaxbira Josuénin jato yoia iki: —Matonra Ibo ninkáxonbi tee axontima iki, jara westíora jakon Dios itan washimis iki, jaki yoitimax mato

ochaketianra, teneyamakin mato oin-restima iki.

²⁰Ja jenetaanan maton wetsa diosbo akinnaitianra, Ibon mato jakonma imati iki, jaskáxonra ichabires jakonhabea ixonbi mato keyoti iki —akin.

²¹Jatianra jonibaon neskáa iki: —Jaskarara noa winótima iki. Nonra ja Ibon yoia keskábo tee axonti iki —akinbo.

²²Jatianra Josuénin jato neskáa iki: —Matobi riki ja Ibon yoia tee axón-noxon katotabo, itan jaskara riki iki ikábo —akin. Jatianra noabo riki, iki ikana iki.

²³Jainxonra Josuénin jato neskáa iki: —Jaskara iketian jatíbi mato xaran iká wetsa diosbo jenekanwe, jaskátaanan jatíbi maton shinanyanixbi Israelbaon Ibo Dioski banékanwe —akin.

²⁴Jatianra jonibaon neskáa iki: —Nonra ja non Ibo Dios akinnai, jainxonra ja ati yoiaboribi non axonti iki —akin akana iki.

²⁵Ja netebira Siquemhainxon, Josué itan jonibaon ja senenhabe konti joi akana iki, esébo itan ja senenhati koshi joibo jato menia iki,

²⁶ja Diossen esé jain iká kirikanin wishakana iki. Japekáora westíora ani makan bixon, ja Ibo rabiti xobonko iká encina jiwi naman aká iki,

²⁷jainxonra Josuénin jatíbi jonibo yoia iki: —Nato makanra jan noa shinanmai iti iki, janra jatíbi ja noa

Ibon yoiabo ninkata iki. Maton Dios betan ikonma inaketian, jan mato jaskarama riki ixon shinanmati —akinra jato aká iki.

²⁸Japekáora Josuénin, westíorabo moa jaton mainbiribi jato raana iki.

Josué mawata

(Jue. 2.6-10)

²⁹Japekáo basimabira, Ibon yonoti Josué Nunman bake, pacha chonka baritiayanix moa mawata iki.

³⁰Jawen mainkobiribi Timnat-serainra miinkana iki, jara Gaas manainoax norteori, Efraín mananman iká iki.

³¹Israelitabaonra, Josué janontian itan ja yamaa pekáobi, Ibon tee axonkana iki, jatianribira yosibo jaxon jatíbi ja Ibon jaskáakin israelitabo akinbea onankana iká iki.

Israelitabaon Josekan xao minna

³²Josekan xao Egiptonkonía bexonra, israelitabaon Siquemhain miinkana iki, ja maira Hamornin bakebo pacha plata koríki kopía Jacobnin maroa iká iki, ja Siquemman papa, japekáora Josekan chiní bakebaona ja mai baneta iki.

Eleazar mawata

³³Ja Aarónman bake Eleazar mawáketianra, jawen bake Fineesen mainko miinkana iki, jara Efraín jonibaon mananman iká iki.